

鳳縣志書

26317 802
12893
00880



鳳縣志序

夫邑之有志猶國之有史也自國都以迄各郡州邑莫不有志一覽而分野疆域人物悉焉吾邑雖萬山巖竇古鳳州其人物雖微其土產雖薄其風俗雖陋抑亦無所取而志之哉嘗讀他書而知其歷代流寓仙釋關梁人物亦不爲少而今多揜隱而莫彰者其故何也蓋邑路當衝要地接秦蜀當秦漢於茲屢為戰場通衢不免兵戈焚掠之所致耳雖然甯可忘也數年來稽之於史書考於郡志他邑而終莫能悉深以為憂突於丙戌初夏得其本於國安黎君之家將見其分野山川仙釋流寓人物關梁祠廟土產之實是其幸也但本中抄錄多有

參之於

錯綜簡畧誠非小疵姑刪其諸而集之以待高明而參考焉

道光六年歲次丙戌夏六月中澣邑學生陳韶誌

疆域

邑之名鳳以鳳曾翔此故東有鳳凰山其西南為鳳嶺又謂南岐蓋自岐山來也在禹貢雍梁之交天文東井分野春秋時以羗居之戰國及秦為隴西郡地漢高帝分置廣漢武帝為武郡領鳳縣九屬有故道河池二縣東漢晉因之魏明帝時地沒於蜀初楊氏部落居仇池至楊難當傾國南寇宋明帝遣裴方明討之難當奔魏後魏拓地仇池於此置故道郡南齊以故道郡置南岐州西魏改歸真郡又改南岐州曰鳳州鳳之名始此隋廢州置河池郡唐初仍為鳳州天寶初改河池郡乾元初復為鳳州五代蜀置武興軍宋初降為團練州分川陝為四路隸秦鳳路南渡後隸西路仍為鳳州領三縣治梁泉縣元以附郭梁泉縣併入明洪武三年仍為鳳州隸鳳

翔府四年改隸漢中府七年降州爲縣

本朝因之

幅員

廣二百里袤二百八十里東至黃牛鋪一百一十里交寶雞縣界西至鉄林寨六十里交甘肅兩當縣界南至南星八十五里交留壩廳界北至曹家庄七十里交兩當縣界

東 白石鋪石門關白家店五星臺草涼驛紅花鋪長橋黃牛鋪共一百一十里交寶雞縣界

東 小路安河平墓進口關強里關共一百八十里交寶雞縣界

西 桑園七里坪土臺曹督坪方石鋪草店馬嶺關單河鋪共五十里交甘肅兩當縣界

南 鳳嶺心紅峽三公廢邱關駟馬橋交留壩廳界

北 郝家山唐藏曹家庄共七十里交甘肅兩當縣界

形勝

大散扼其東武休障其西褒斜阻其南秦嶺限其北重巒疊嶂屹然爲蜀關重地

鳳縣所轄地方里數共四十四里地方 本城計四里三分

東大路里數

朝天嶺距城十五里

郝家山距城二十里

白家店距城四十里

五星臺距城五十五里

紅花鋪距城八十五里

長橋距城九十五里

交鳳翔府寶雞縣界

東北長灘距城九十里

王家臺距城三十里

草涼驛距城七十里

黃牛鋪距城一百一十里

交寶雞縣界

東小路里數

高坪堡距城十五里

馬鞍山距城三十里

下張口距城六十里

上張口距城七十里

車到河距城一百里

正東平墓距城一百二十里

交留壩廳界

正東銀母寺距城一百四十里

東南白雲距城一百九十里

交鳳翔府寶雞縣界

東至寶雞南至留壩廳西北至秦州西當縣界正東進口關距城一百四十里交

寶雞縣界正東石溝距城一百九十里東安民寨距城八十里交寶雞縣界

南大路里數

三公距城五十里

廢邱關距城六十里

正南南星交留壩廳界

西大路里數

七星山距城十里

陰德岩距城二十里

下豐禾距城三十里

薛家堡距城三十五里

鉄林寨距城五十五里

何家堡距城三十五里

上豐禾距城四十五里

馬嶺關距城四十五里

交甘肅秦州兩當縣界

峯岩距城二十里

譚家岩距城三十里

上小河距城八十里

下小河距城一百里

尖山距城四十里

瓦房壩距一百里

交沔縣界

箭壑埡距城二百二十里

交沔縣界

通下交留壩界

黑河距城三百二十里係秦州甘肅兩當縣所轄

北路里數

北山距城十五里

畫坪堡距城十里

龐家河距城五十里

唐藏距城六十里

太渠距城九十里

虎廟子距城六十里

楊家庄距城八十五里

曹家庄距城七十五里

交甘肅兩當縣界

風俗

務農力穡質直好義與岐壤相接土風民俗猶有幽風之遺

邑在山川叢會之中不勝其紀就府志所載及為人所指明者紀之雖不

甚悉亦足得其大畧云

要隘

縣東小路進口關要隘一處與寶雞縣交界

空鑽子要隘一處與留壩廳交界

縣西小路鉄爐川要隘一處與沔縣交界

馬嶺關要隘一處與兩當縣交界

縣南大路避難寨蓮花石要隘一處與留壩廳萬壩河交界

縣北唐藏要隘一處與兩當縣寶雞縣交界

名山

棋盤山冲妙先生奕棋處下有丹竈遺迹西有古洞長松

鳳凰山在縣東三里周時鳳自岐山來曾棲此上有畝餘不生草木相傳即鳳棲處

武都山在縣南六十里上產雄黃

紫柏山在縣南一百三十里勢極高峻紫柏成林雖盛夏亦凝冰方輿覽勝云上

有七十二洞仙靈之所集也傳漢張良避穀於此山下有留侯祠

玉皇山在縣東八十里山寒不生禽鳥上有大石覆如殿宇玉皇像前有天然

石盆旱禱即雨

太白山在縣東六十里上有石洞靈湫

鳳嶺在縣南二十五里昔曾棲鳳莫考其詳嶺北有湮洞濤煙霧昏迷日光不到

冬則堅冰數里冷氣襲人旁有菜子溝溝中有蜂岩寺寺中有石穴穴內有葦石院三層穴產桃樹二株秋華冬實色赤大如香櫟上有石泉味亦甚甘院產金竹紅白二合四面旋繞

九峯山在縣北十里其峯有九傳有九鳳樓之故名竹雲洞在南岐山十里明嘉靖乙

巳歲

勅封忠顯老龍王御賜竹雲洞三大字列於洞上

乾隆乙巳歲令李如桐建行宮三間廂房四間大門樓一間鍾

鼓各一

黃牛寨在縣東北一百一十里宋吳玠步將楊從義與金撒離喝大戰於此嶓嶮山在縣南三百里漢水二源此其一也

御愛山在縣東北三十里唐僖宗幸蜀目其雄秀愛玩不忍去故得名也山下有漢辛金錠城池舊址

南岐山在縣南十里上有竹雲洞有周之興鳳翩翩而集焉故曰南岐山

賈家寨山在縣北七十里上極險峻上多石竈昔人曾避兵於此鉄鎖懸空挽登其頂有石泉一區萬人飲之不竭

東西二堡子山在縣二里宋吳曦屯兵處

豆積山在縣北二里一名虎腦一名遮跡上有消災岩佛閣下臨嘉陵江

長松山在縣東北一百里三峰直聳立供產喬松

麻峪山在縣南一百里山形峻險奸究之藪

大散河在縣東一百四十里發源大散嶺流經縣西與小峪河合一名故道水此水自東

河橋來經鳳至嶽由大魚關通舟楫至兩河口遶畧陽城西南會夾渠八渡二水入蜀即嘉陵江一名白水江

夫子嶺在縣東八十里安河發源處

安河發源夫子嶺在縣東八十五里由東關遶北投入嘉陵江沿城西流與小峪河合名斜峪河其水可資灌溉為一邑之水利

紅岩河在縣西七十里發源秦州與嘉陵江合岩亦故名

嘉陵江在縣東一百四十里自東河橋發源流經縣西由兩當縣入泉江

七十二渡河在縣南五十里源發金竹山流入洋水其水濛洄人渡者凡七十二處

紫金河在縣北一百里源發太白山流經武休關入漢中為山河堰即褒水之源也

小峪河在縣西三十里入嘉陵江

野羊河在縣南七十里源發紫柏山至廢邱關與東溝水合其山多野羊故名
鳴玉泉在縣西十里一名滴流泉聲如鳴珮此與大散紅崖紫金三水皆可以灌

田通省志以四水為邑之水利

香泉在縣北十五里水出石罅味甘冽可釀酒

靈泉在縣南七十里石縫涓流旁立神祠

鼃鼃池在三岔驛西七里池居山頂水極澄澈四時不竭

黃花川在縣東北三里大散水流入唐有黃花縣後併入梁泉縣

錦屏山在縣西五里今河西坪是

君子山在縣西南十五里一名欣雲山一名倉坪上有三聖夫人洞方池各一
牛蹄嶺在縣東一百里石上牛蹄宛然可觀

蜜蜂溝在縣西南一百里地多蜜蜂居民利之故名

至夫鋪舍村落津梁閔隘凡屬民居皆觀風者所宜留意遂類紀之

東則龍口 白石古鎮 石門關 白家店

五星臺 草涼驛 紅花鋪 長橋

黃牛鋪 王家臺 北星

接寶雞縣凡一百一十里

西則桑園 七里坪 土臺 曹督坪

方石鋪 草店 馬嶺關 單河鋪

接甘肅兩當縣界凡五十里

南則鳳嶺 心紅鋪 廢邱關 三公驛

駟馬橋

接留壩廳界凡八十里

北則郝家山 唐藏 曹家庄

接兩當縣界凡七十里此鄉村之可畧舉者

總鋪 白石 土關 小堡子 草涼 紅花

黃牛 方石 單河 姜子 石獅 鳳嶺

心紅三公

北抵寶雞縣南抵留壩廳鋪舍之可紀如此

津梁則鳳橋 斜谷 石獅子 高家橋 王子崖

草涼 三公 判官 小橋 桑坪

石峽 石窰 駟馬

關隘則廢邱 馬嶺 大散 武林

仙人 進口 和尚原 黃牛堡 吳曦堡

土關隘 青岩峪

竹菴曰府志稱漢中俗屏浮華土風樸厚邑之陋僂過於列屬而士勤詩書者或返不逮文獻凋零是在振興者耳俗信鬼抹樵者多虎患事土神甚虔士敦行寔重廉恥知尊長事上而矜強悍逞武斷者時亦有之

鳳於漢中本非巨邑而幅員特廣其鋪舍村落與夫梁橋關隘悉在山水之間土瘠民貧所固然也碩草食卉服而猶勤力作恪供賦役其風殊為近古但地值衝要差務終繹富者力或能免貧者當如之何予編疆域並土風亦附言之苟蒞斯土者思有以少息焉則不獨鳳邑之幸也

祠墓

文廟在縣治東明洪武四年令王畿創建乾隆二十五年令王廷鈞戟門益三祠名宦祠在戟門東府志云殘碑內載祀隋蕭瑀五代王桓宗張暉唐庾趙鼎种世

衡程珣揚政今廢改祠

鄉賢祠在戟門西

忠孝祠在儒學內祀明辛宏惠大剛黎屏極清王天章

社稷壇在西閣外雍正十一年建

風雲雷雨山川壇在東閣外雍正十一年建

厲壇在西閣外乾隆二十六年令王廷鈞建

先農壇在縣東四里雍正五年二月奉諭旨二十六年令王廷鈞築月臺

城隍廟舊在西門外今移治西

土地祠在儀門外乾隆二十六年令王廷鈞重修

節孝祠在縣東城門外月城內雍正七年建

乾隆二十六年命王廷鈞建城內東街申明亭舊址

乾隆五十四年令李如桐移治東

闕帝廟舊在察院移治西嘉靖八年三月初一日九里里長鼎建

省祭官李維新督工醫學余湘

康熙三十年歲次丁丑孟夏重建

雍正五年歲次丁未冬令河朔于兆奉諭旨追封闕聖帝君三代皆公爵

勅封曾祖先昭公勅封祖裕昌公勅封父成忠公春秋二祭

雍正七年六月奉旨五月十三日一祭

勅封忠義神武靈祐關聖大帝

魁星樓在治南山城

三義廟在縣東關

火神廟在縣東門外南

州主忠護王廟在縣北三里唐僖宗幸蜀至白石鎮有史進醪醴上問其居曰居父子峪因賜金帛問以姓名不答送至其家父子峪在梁泉縣之東北有廟址鐘碑存焉土人歲時致祭宣和初請於朝賜爵曰州主忠護王封其子曰太子協濟王旌其草野不忘君之意也峪在猴石溝傳有醴泉其水釀酒最佳今被山崩傾覆

東嶽廟在東郊三里

三官廟在棲鳳橋南康熙二十一年欽命奮威大將軍王進寶建

洪利寺在縣南二十里唐太歷十三年銀青光祿大夫陸海建明洪武四年重修天順元年五月二十七日補修

聖德寺在縣東南六里唐貞元中建戴正倫記梁肅書向稱文翰林俱絕

乾隆五十二年命李如桐改建

三清宮在東郊

太白廟後建萬壽宮在洪利寺舊址

真武宮在西郊

觀音堂在縣北門內十五步

土地廟在縣北門內三十步乾隆五十二年命李如桐重建

北極宮在縣東城內月城

建獻殿一間並院墻大門

地藏庵在縣西城門西郊距縣一里

貞女墓在縣東城門外東郊距縣二里

文彥博墓在縣五星臺距縣五十五里

真武宮在縣西城門外西郊距城一里

廣福寺在治北前鄉進士奉直大夫知直隸鳳陽府宿州事石玟建

城隍廟在治北正德十一年冬知縣主簿教諭訓導典史百戶暨九里里長重建

準提庵在治北崇禎歲次辛未孟夏建

馬王廟在治北崇禎二年三月二十七日閩邑紳衿士庶重建

關帝廟在治南

走平寺在縣東一百里舊在山嶺山裂寺走平地亦奇事也故名

鹿母寺在縣東四十五里昔有一糜鹿乳一棄女凡十二年女賦性溫良恭敬慈

惠寡言哆囉王親迎路絕崎嶇文武臣僚道前進龍馬疲倦按轡嘆曰此

望家坡也古蹟宛然可觀封立昭陽鍾愛如壘遽以疾終王慟哭如醉因女生前

喜好山水王命大學士舒長正殿將軍武超榮葬山峪忽迅雷驟雨峪左產奇

花千朵峪右生蓮萬枝花心各座佛像一尊王對文武泣曰此正千千諸佛萬萬

菩薩如有禮懺者延壽耄耄釋門有蓮花寶懺真經數卷僧家之法派

入門之初級也至成化十三年前鄉進士奉直大夫知直隸鳳陽府宿州事石玟

前建白衣大士正殿三間僧舍六間壁演哆囉鹿女之來歷土人歲祀男女絡繹名鹿母寺

龍泉寺在縣東十五里寺旁泉大小有九產接骨丹患者虔禱掘地求之得赤螬蟬不水居服之立愈土人設會祀之故名龍泉寺

白蟒寺在縣東一百三十里時久旱有金甲神跨白蟒來立雨故建寺
九仙寺在縣西南四十里

連雲寺在縣南

焦岩寺在縣東三十里成化十年前鄉進士奉直大夫知直隸鳳陽府宿州事石玟建

蜂岩寺在縣南三十五里

平墓在縣東一百二十里傳爲諸葛武侯假墓司馬懿平之故名平墓

消災寺在縣北四里州主忠護王太子協濟王廟址鐘碑宛然可觀

豆積山在縣北三里唐冲妙先生張果老棲隱處傳張果老梁泉里人冬居鸞鷲夏居豆積在消災寺佛閣之西今稱爲果仙洞宋淳熙中憲使李大正刻遯跡山三大字於石上袁桂有詩辨之云

通元靈異不多此處名山未是訛豆積更名爲遯跡西康麥積合如何
麥積山見五代王仁裕詩

鬼迷店在縣境三里

宋陸游詩往者秦蜀間慷慨事征戍猿啼鬼迷

店馬噤飛石鋪即此

馬王廟在治西北

康熙八年歲次己酉仲夏建

乾隆十九年歲次甲戌季夏重修

留侯祠在紫柏山下今名碑亭溝口廟台子蜀道左有漢張良避穀處
石碑尚存

忠烈祠在仙人關祀宋吳忠烈公玠

茶亭在縣東關北 漢中府通判署鳳縣事熊延建

三清宮在縣南

黃花故縣在縣東北十里寰宇記云初在鳳州北六十里本漢故道縣唐
武德初分置宋寶曆中省入梁泉

草涼樓在縣東北六十里唐明皇駐蹕於此

吸月亭在縣舊郡圃宋建亭前植杏取蘇東坡與客飲杏花下詩勸君且
吸杯中月之句爲名

飛蓋亭在縣治取宋邵堯夫詩楊柳垂青絲風動如飛蓋之句爲名

黃牛堡在縣東北當大散關之行吳玠楊從義所築故道廢縣在縣境漢
高帝襲雍引兵從故道敗章邯於陳倉即此

南岐州南岐志云有周之興鸞鷲鳴於岐山翱翔而南接縣東三里鳳凰山相傳
即鳳棲處南岐山在縣南十里有竹雲洞龍湫池之勝後魏延昌中設南岐州

於此後又改為鳳州治梁泉縣原以梁泉入州改州為縣

陳倉古道在縣南百里自桑坪山入口至沔縣百丈坡出延亘二百餘里荒塞不通漢韓信暗度陳倉即此

白石古鎮在縣東北十里即今白石鋪

梁泉廢縣在縣東二里今改為山川壇寰宇記云梁泉在縣西二十里流與嘉陵江合後魏置縣名梁泉

迴車戍在縣南一百六十里梁太清年西魏將楊寬率眾七萬由陳倉取迴車戍入斜谷關即此

孔雀臺在縣東南九十里一名石臺土人傳云山昔產孔雀故名

車到河在縣東一百里地產七星魚身有朱星凡七不水居掘沙得之味甚鮮美

河池故縣在縣西單河鋪有城隍廟舊址

父子峪在縣北三里崖石大小相抱如父子然

廢邱關項羽封章邯為雍王都廢邱漢令樊噲引水灌之邯自殺即此北至三公驛五十三步橋名古恩德橋橋左有楚項羽封章邯處石碑尚存

吳曦堡宋吳曦所築

禹王廟在縣北九十里嶓塚山下明嘉靖十六年令王儒建

藥王廟在縣治西祀唐真人孫思邈

嘯歌堂在縣治西宋建取黃魯直嘯歌山水重之句為名

文昌帝君宮在縣治南

畫眉關在縣南一百九十里地產畫眉鳥故名

進口關在縣東南一百五十里諸葛武侯自五丈原還柩死諸葛能走
生仲達處

土關隘在縣東四十五里自青岡坪過武休甚峻元汪世顯取關山寨
入蜀徑此即今土關鋪

武休關在縣南二百二十里即今武關

仙人關在縣西一百里其路左自成州經天水出皂郊堡抵秦州右自兩當縣
趨鳳州出大散關至和尚原和尚原宋吳玠大戰金兀朮於此

柴關嶺在縣南一百五十里叢林中有連理樹臬司王時薰立亭其旁因以
為名且為作詩咏之

洪利寺所屬寺院

走平寺 羅卜庵 焦岩寺 古剎寺 西小寺 連雲寺 聖德寺

羅漢寺 觀音庵 洪靈寺 龍洞寺 南山寺 清溪寺 白蟾寺

桑園寺 蜂岩寺 鹿母寺 霄霧寺 常期寺 青峰寺 天慶觀

普門院 小山寺 九鳳寺 九方洞 長安寺 廣福寺 銀母寺

石門關 瓦全寺 萬臺寺 鎮江寺 聖德寺 景禪寺 九仙寺

慧香院 昆盧寺 伽藍坡佛殿 前紫栢山 高峯寺 石佛寺

後紫栢山 雲峰寺 周坪庵 周坪西庵 麻地庵 梁泉寺 盤龍寺

南 庵 細辛溝庵 寂照庵 安河寺 龍鳳寺 觀音堂 長橋寺

觀音院 禪堂寺 四凹寺 龍泉寺 三教宮 陳倉寺 九峯寺

黑松坪道 消災寺 華巖寺 雲巖寺 蛇道寺 重龍寺 常期寺

御愛山寺 楊家寺 牛蹄寺

捐俸建修各官 鳳縣知縣王廷璋 湖廣襄陽府宜城縣人

主簿王楫 順天府固安縣人

教諭馮杞 四川叙州府宜賓縣人

訓導張澤 四川重慶府忠州人

典史黃佐 四川重慶府巴縣人

省祭官李維新

秦府典膳何玠

義官辛翥 張鐸 劉徹

壽官齊禮 醫官何顯祿 陰陽官張翰

僧會司覺錢徒 淨實 淨松

致仕通判劉芳 致仕潮州府知府石俊

四川瀘州納溪縣知縣李 寵 直隸昌黎縣知縣來仕

中書科掌印中書楊 鑑 山東兗州府曲阜縣知縣王建

山西平陽衛縣丞王 科

嘉靖九年五月十三日勒石 住持清鑑覺惠徒淨楹淨柵淨梅

竹菴曰古之制祀典也為其禦災捍患勞能定國足為民福報功以請
民命則犧牲粢盛不容已也自漢以來老佛之祠遍天下吾不知其於
民何功然賣妻鬻子而事之者有矣墮指裂膚而祀之者有矣歷數千年惡
習不改安得火其書廬其居以驚聾聵如有唐狄相之所為耶正祀之外本不
必紀今亦備紀之與古跡並存設讀者知正祀而外即為淫祀而不之祭是予
之厚望也然風俗信鬼且有以予言為河漢者噫

建置

城之始置未詳元至正二十八年平章蔡均重修南跨山北臨嘉陵江週
圍築百五十雉丈高二丈五尺池深五尺東西南北四門計四里三分蓋因
鳳舊治也

明嘉靖十九年令司恩甃以碍石建樓上東曰拱辰西曰秩成南曰南岐北
曰望江萬曆二年令江大鯤更加繕葺以上基礎堞墻八百四十八個每堵
長八尺五寸週圍築百五十雉丈計四里三分嘉靖十九年因山潰無路
將南門封閉止留東西北三門往來出入

順治十一年地震城圯令張石麟重修治凡九里
登俊安河樂從方石八廟順治梁泉永興嘉陵
每里十甲舊例每小里一人花戶多寡不等輪遞催管本里錢糧今
俱係花戶自封投櫃

乾隆二十八年令王廷鈞重修週圍四里三分計長七百七十六丈三尺高二丈
底厚二丈五尺頂厚一丈五尺磚砌垛牆八百四十八個每堵長八尺五寸頂底
均厚一丈五寸估銀部議一萬六千六百六十八兩九錢

縣署因古鳳州舊基在文廟西城隍廟東

宋元廢建不一

明洪武三年令王畿於原基重建

嘉靖十八年令司思加拓之後屢被寇氛毀廢順治初令彭振翮積為修葺
十一年令張石麟重修永積庫在大堂東儀門大門各司房署在縣後
申明亭旌善亭在大門兩旁常平倉在縣署西規模畧具獄在縣署西
乾隆二十八年令王廷鈞重修捕廳廨舊在洪利寺東

乾隆三十三年令張國楠移縣署西儒學署宋故址也在廟東北元末廢
明洪武四年令王畿建正統九年叅政孫毓副使莊觀重修

天順六年馬傑洪治十三年令甯浩嘉靖十四年副使劉彭年各嗣
修之明末毀於兵燹順治初訓導黃御哀志云儒學署東西皆逼

民居明倫堂在文廟東已遭拆毀

康熙四十三年令高斗光移明倫堂於文廟後北原基遂為營署占據
僅從名而已乾隆三十三年令呂兆鬣重修

行署察院在東門外布政分司在縣治西今為社學 察院在縣治西

乾隆五十四年令李如桐改鳳翼書院 府館在縣治西俱明洪武中置今
為叅將署 留壩巡檢司宏治年遷於廢邱闕明正德中徙柴關嶺南
清風閣巡檢司明嘉靖年置

社學向在治之北後設於東門內一在文昌宮廢置者屢矣今學雖
有二而資不豐從者甚少教者亦視為具文士氣之所以難振也

乾隆二十九年令王廷鈞因裁汰清風閣巡檢司留遺公田以作束金

陰陽學在縣治西 醫學在縣治東 僧會司在洪利寺 道會司在城隍廟

預備倉在縣治東今移治北射圃無 漏澤園無 養濟院在西門外

市集在縣東中街西 草涼驛驛丞一員 清風閣巡檢一員

三岔驛驛丞一員 松林驛驛丞一員 留壩驛驛丞一員

武關驛驛丞一員 縣治捕廳一員 廳在洪利寺

東邑令張國楠移廨南北

本朝乾隆二十一年增置漢中分府始與鳳判改巡檢為驛丞廨在留
壩分府署南三岔驛丞廨在縣南五十里今徙置廢邱闕三岔驛內

草涼驛驛丞廨在驛內漢鳳路叅將署明無設防本朝初設署縣城
縣城東今移置舊府館

中軍守備廨在縣治東

馬道防兵五十名

留壩防兵五十名

草涼驛把總一員防兵五十名

東河橋防兵五十名

二里關防兵五十名

漢鳳路舊設經制馬兵二百四十名步兵五百六十名今除裁汰外設經制
馬兵一百八十五名步兵七十名共三百六十名

叅將馬八匹守備馬四匹千總一員把總二員馬六匹戰馬一百八十五匹

叅將歲額官兵馬匹俸餉銀兩共一萬五千七百四十五兩零

草涼驛在縣東北七十里額馬五十四匹

梁山驛在治東北四十步額馬五十四匹縣馬五匹

三公驛在縣南五十里額馬五十四匹

松林驛在縣西南一百二十里額馬五十四匹

留壩驛驛丞兼攝司獄事在縣西南一百九十里額馬五十四匹

武關驛在縣南二百四十里額馬五十四匹乾隆二十四年裁汰清風閣驛驛丞一員

武關驛驛丞一員其餘五驛額設馬夫各二十七名鳳縣縣馬夫三名

竹菴曰邑建置因鳳州故址其上無考取府志所僅存者著於篇留壩設
分府後非邑所能轄則地猶仍然其故也宜並存之

田民里凡九今只餘三已前不論論今實徵者一民地原額折正一等共地三千五百五十四頃六十畝一分四厘每畝徵糧一升四合二勺共徵糧五千三十一石八斗八升二合六勺每石徵銀一兩八錢三分四厘共徵銀九千二百三十兩一錢五分六厘內除奉

旨豁免無主荒地三千三百八十頃二十四畝五分五毫應免糧四千六百二十石六斗二升八合四勺應免銀八千四百七十八兩五錢四分八厘內節年開墾地二百一十一石一斗七升五勺該徵銀五百三十二兩五錢六分三厘又除分撥留壩地三十八頃九十六畝四分七厘四毫該徵糧七十三石五斗四升九勺該徵銀一百三十四兩八錢九分八厘止實在地三百四十八頃二十三畝六分二厘八毫九絲該糧六百一十八石八斗八升四勺該銀一千一百四十八兩七錢八分三厘

每年額征銀一千八百五十兩五錢一分二厘

遇閏加銀二十四兩六錢一分二厘

耗羨銀二百八十兩二厘額征課程銀一十四五錢七分四厘係鋪戶出辦
遇閏加銀一兩二錢一分四厘四毫九絲九忽六微七纖六塵

額征畜稅銀五兩六錢五分五厘係馬騾出辦原無定額儘收儘解
額征地稅銀一十三兩三分係買房地業主出辦原無定額儘收儘解

額征庫茸八兩熊胆四個改折銀二兩九錢四厘
額征三驛折色糧草價銀七十九兩四錢八分

額征學地三十二畝五分又新墾地二十畝每畝徵銀二分八厘共銀一兩四錢七分
額征驛糧改折米銀九十二兩五錢五分八厘

額征鹽引七百三十八張鹽課銀五十九兩四分

康熙十九年五分加增銀三十六兩九錢在於二十五年奉文豁免又七分加
增銀五十一兩六錢六分

遇閏加增銀十二兩三錢在於二十五年奉文豁免以上除二項豁免外實在
原額並七分加增銀一百一十兩七錢

額設草涼梁山三岔三驛共額馬一百五十四匹額設馬夫七十七名每歲共動
支工料銀五千二百五兩六錢

遇閏加銀三百六十九兩六錢

額設舖司兵九塘共五十二名工食銀三百一十二兩

額設孤貧十名歲歲支月糧銀二十八兩八錢布花銀七兩五錢遇閏加增銀三兩

額設損夫六十八名工食銀八百六十四兩餘剩銀六兩四錢

額設廩生二十名每名歲支銀三兩一錢四厘月糧銀六十二兩八分遇閏加增銀五
兩一錢七分三厘三毫三絲

額設膳夫二名歲支銀一十三兩三錢三分三厘三毫三絲遇閏加增銀一兩一錢
一分一厘一毫一絲工項下

原編俸工銀一千五十六兩八錢一分三厘內除

荒銀一千二十一兩三錢六分一厘

實征銀三十五兩四錢五分二厘又收欽奉上諭事案內撥補教職全俸銀四十兩又收敬獻芻蕘等事案內撥補廩膳不敷月糧銀四十六兩五錢又收欽奉上諭事案內撥補各役工食銀六百九十四兩八錢又收欽奉上諭事案內撥補鋪司兵工食銀三百一十二兩又收報明事案內撥補佐雜俸工食銀八十七兩四分

以上共銀一千二百一十五兩七錢九分二厘

知縣一員俸薪銀二十四兩二錢五分六厘

門子二名工食銀一十二兩

皂隸伴作一十五名全俸銀六兩六分四厘工食銀九十兩

馬快八名工食銀二百三十四兩四錢 民壯四十六名工食銀二百七十六兩

禁卒六名工食銀四十八兩 庫子四名工食銀二十四兩

傘扇夫二名工食銀十二兩 斗級四名工食銀二十四兩

典史一員俸薪銀三十一兩五錢二分

門子一名工食銀六兩 皂隸四名工食銀二十四兩

馬夫一名工食銀六兩

訓導一員全俸銀四十兩 齋夫三名工食銀三十六兩

膳夫二名工食銀一十三兩三錢三分三厘

門斗二名工食銀十四兩四錢

廩生二十名月糧銀六十二兩

三岔巡檢一員俸薪銀三十一兩五錢二分 皂隸二名工食銀十二兩

草涼巡檢一員俸薪銀三十一兩五錢二分 皂隸二名工食銀十二兩

一襍支項下

原編春秋祭祀鄉飲等項銀四百一十八兩二錢五分二厘內春秋祭祀銀九十

一兩五錢七分二厘 鄉飲銀二錢八分

鐘鼓夫五名工食銀一十二兩 渡口水手一名工食銀二兩四錢

舖司兵五十二名工食銀三百一十二兩

驛站項下

原編站支銀三千三百三十九兩一錢八分八厘內除荒銀二千八百七十五兩三錢九分

實征銀四百六十三兩七錢九分八厘內除額協富平縣並臨洮府屬驛站抵

餉銀一百八十四兩三錢九分三厘入起運外止該銀二百七十九兩三分一厘又收盤

屋渭南等縣驛站免留兵餉銀二百二十兩三分二厘又收城洋西鄉等縣撥支

馬夫工料銀七百五十四兩八錢二分共銀一千七百五十四兩二錢五分七厘

一孤貧項下

原編孤貧十名口糧銀二十八兩八錢內除荒銀二十六兩三分三厘

實征銀二兩七錢六分七厘又赴司請領不敷口糧銀三十三兩二錢三分三厘共銀

三十六兩

原編布花銀七兩五錢內除荒銀六兩七錢八分二厘

實支銀七錢一分八厘

戶口

民數

男大口六千七百口男小口一萬七千七百一十口
女大口四千九百二十五口女小口九千一百七十二口

積貯

常平倉額貯京斗穀一萬八千八百八石一斗八升八合六勺

社倉五處額貯京斗穀三千二百一十七石內

草涼社貯京斗穀七百石

唐藏社貯京斗穀六百一十七石

平墓社貯京斗穀六百石

草店社貯京斗穀九百石

廢邱社貯京斗穀四百石

每穀一石部價銀五兩

一衙署七十間

一營房十四座每年在於公費銀內動支銀二十六兩四錢移交營員修理堅固

一救火器具分貯東西城門

一棧道東北至黃牛鋪一百一十里西至南星八十五里

一公費銀三百二十里

一公帑經費銀一千兩

竹菴曰其存留經費詳載賦役全書者不悉記乾隆二十九年留壩設分

府改巡檢為驛丞又裁汰清風松林武關三驛驛丞現在知縣一訓導一

典史一驛丞二俸薪養廉與各書役工食暨祭祀鄉祀賓興廩膳驛站
損夫鋪司孤貧諸項約盡一邑之賦不供一邑之用藉資他邑為多起運僅
存其名而已至軍營兵馬之需又不係此

藥屬

益母 黃柏 白芨 地骨皮 車前子 五倍子 牛蒡子 紫 草
貝母 河車 淫羊藿 桑寄生 七星魚 五味子 鹿 茸 黨 參
牛黃 金銀花 五靈脂 鹿壽州 五加皮 射 香 龍 骨 茯 苓
白葛花 竹節 參 子母椒 山羊血 百合 熊 胆 山 藥 何首烏
牡丹皮 骨碎補 赤芍 蟬 虎骨 遠志 冬 仁 側 柏 葉 金絲柳

鳳州酒 仙 毛 赤 芍 白 芍 牛 膝 黃 精 鹿 胎 鷹 爪
鯽 魚 鱉 甲 半 夏

宋元豐間勅鳳州取金絲柳一百株

物產

邑風物多同雍而土色與梁為近五穀瓜瓠菓蔬凡二州所恒產者鳳咸有
之花木漆蜜藥味及鳥獸蟲魚產於鳳者他邑多不能及若金絲柳紫
河車射香鹿茸熊膽虎骨與夫鷄鷄山鷄狐鹿熊豹之屬可以佐衣食而
利人用者美而且多至紫柏冬桃接骨丹七星魚則更非他地所有然取之甚難
利者率履險冒患取給朝夕故官亦不甚賦焉噫鳳之民以樵獵所獲日御

酒食而食反不充衣不遮體至逃亡而爲餓莩者比之矣豈非物產豐饒而荒於耕織之所致與

竹菴曰原額鳳地折正一等田凡三千餘頃丁折下之凡九千三百餘丁應徵銀一萬四千餘兩自順治七年康熙二十三年至乾隆二十六年屢爲加恩豁免緩減十之八九矣而鳳民凋敝如故論者謂是軍興騷動使然夫鳳田日墾賦未聞增官軍站驛等費無不仰給於上况留壩又設分府以理差務則今所取於民者幾何今鳳之民如曩日者勤於稼穡習於節儉以暇日採薪逐獸則上可以供國課下可以養室家山肴野味足爲歲時豐臘之資庶幾殷繁富庶含哺鼓腹樂化日之舒長也何噉之爲予見其地多蔓草而春糧不蓄爲是貧而不勤儉者故有是說

政績

宋吳玠順德軍人川陝宣撫副使初爲秦鳳等州制置使時屢破敵兵安護士民

清孟喬芳滿州人國初爲川陝總督巡漢先撫百姓憐雲棧荒蕪招四方人民着占田地開墾成熟永爲己業尤禁兵無騷擾民沐仁澤鳳地始有賃地活坐死葬之遺跡

賈漢復山西曲沃縣人兵部尚書巡撫陝西開修棧道奏蠲荒絕糧百姓莫不感戴

葛思泰川陝總督憐棧道崎嶇捐俸修理川陝文武官各捐俸因委泰將孫清督修雲棧去未鑿石平險為易行旅泣之竝建祠

頌德

殷泰川陝總督滿州人辛卯秋巡蜀往返雲棧禁絕供億不擾民間一草一粟父老子弟以鷄酒相餉者曰我儕小人望公如歲矣藹然慰勞執爵而飲愉愉如也公行政不尚虛文事無巨細必躬必慎邊鄙龍警服吏治肅清禁絕耗歛核實軍伍人不敢犯所在為公建祠立坊勒石邑東門外稍門尚建碑三勒石二古跡尚存

清總制郝公經鳳邑偶遇亢旱捐俸禱雨甘霖立降百姓立碑建祠

清邑令汪 疇建祠 熊延建祠 魏廷賢勒碑 呂兆鬣建祠

醫學

本縣舊係小學原額文生每歲科各進八名武生每考止進八名今現在文生一百三十名內廩生二十名增生二十名附生九十名武生六十二名共一百九十二名並無增減

人物

唐吳郁鳳州人為侍御史以言事被謫居家不仕與杜子美交游唐韋績墨數吳郁字體綿密不讓當時

強循字季先鳳州人累官雍州司戶叅軍華原無泉人畜多渴死

循教人浚渠水以灌田一方利之號強公渠詔書褒予甚厚歷大理寺少
卿為政辭給不為威嚴過人盡信不疑

宋張珏鳳州人初從軍釣魚山以戰功官中軍都統制人號虓將寶祐
末元兵圍合州珏與王堅協力戰守攻之九月不能下德祐初陞為四川
制置使糧盡元遣人說降不聽城破巷戰不支東走涪被執至安西
自縊死珏魁雄有謀善用兵出奇設謀算無遺策

明何福全鳳州人洪武中以人材初任縣丞有治聲守威州威惠兼行蠻人
信服擢蜀中左叅議

劉宏道洪武癸酉舉人歷官都御史獨持丰采中外悍服

梁春永樂間以經術舉用歷有政聲官至兩淮鹽運使剔奸釐弊才稱
其職

姜斌正統丁卯舉人官北城兵馬司強悍斂跡

石玖成化癸卯舉人家貧為諸生時拾遺金五百還其主官宿州刺史卓有治行
明辛宏性最孝成化中父歿廬於墓側朝夕哀泣有鵲巢鹿遶之異
墓前所植禾稼獨盛人以為孝感

惠大剛能以挺制虎虎不能動前後斃以數十計後遭誣枉非罪慘死
人多惜之制憲葛思泰過鳳聞之作搏虎行

黎屏極邑武生崇禎七年流賊破城挺身巷戰自辰至午以刀折被殺

辛思齊字鳳亭鳳縣人性倜儻有膂力萬歷丙午舉人歷官天津
叅政清慎著名爲鳳邑條議以甦民困致仕歸鳳之東山離城百里半
夜賊至率子孫及家僕戰至黎明殺賊數十人爲賊所執橫肆搜索齊
曰恨不咬汝賊力盡不敵可即殺我賊欲挾誑漢中城百計誘之不肯從
迫以殺齊子女齊亦不顧憤躍不已激賊怒遂殺至死氣不少挫罵不
絕口

牛彩萬歷中以明經爲成都教授士奉爲師表及歸爲李賊所執
不屈被殺牛光斗彩之子也以恩選歷開封郟丞李賊決河灌城
光斗作筏拯溺捐俸煮粥民賴以全經河決督修有功擢知本府甲申

之變掛冠歸里講學洪利寺卒之日通國寺大夫高其節謚曰貞靖先生

牛一身光斗之子也以明經爲原學正王輔臣以偽職脅授不從棄官歸里

復爲黔逆劫其家遂窮約而終

王多才崇禎間以明經爲慶陽廣文藹然師範可式士林歸里隱於錦屏
山年八十一卒

清孝子王天章年六十七歲係本縣民籍附生賦性溫良持躬謹慎父死廬
墓三年母疾衣不解帶篤親和隣人無間言孝義可風於乾隆二十年詳
請旌表建坊

選舉

明田原洪武乙丑進士官副使 劉宏道洪武癸酉舉人官都御史

周茂洪武丙子舉人 周舉洪武丙子舉人

趙恕永樂戊子舉人 王廷訓永樂辛卯舉人官河南陳州府

何益宣德壬子舉人官祠祭司郎中

姜斌正統丁卯舉人官北城兵馬司

梁本天順壬午舉人官直隸天津府滄州

石玫成化癸卯舉人奉直大夫前鄉進士官直隸鳳陽府宿州

王偉宏治戊午舉人官禮部司務廳

辛思齊萬曆丙午舉人官天津兵備副使

貢士

明梁春官兩淮鹽運使 楊都官都水司郎中

辛自銘官推官 鐘鏞官山西甯武府偏關縣

任英官河南光州 田祥官同知

劉宏道官都御史 田理官御史

許賢官通判 劉芳官通判

趙世昌官山東萊州府 苗可棟

苗坤官工部堂主事 趙信官主簿

趙謙 王建官山東兗州府曲阜縣

石 堅官山東東昌府博平縣

蒲政官通判

石 俊官成都府潮州府

侯用官山西朔平府朔州

何福全官叅議

來仕官直隸昌黎縣

楊明

楊鑑官中書科掌印中書

梁 校官教授

李 寵官四川瀘州納溪縣

黎垣極

黎永質官秦府教授

王多才官慶陽廣文

念 易官山西平陽府通判

牛 彩官成都府教授

牛光斗官開封府知府

盧應士

盧效先

羅九鼎

譙鳳朔

盧啓先

郭潤大使

本朝 鄧

璿

拔貢生武
威縣教諭

鄧

瑛

歲貢扶風
縣訓導

保舉

念餘芳

明經

孫昌祖

魏 旭

董獻謀

盧明奇

孫榮祖

魏 炳

董 光

張聯魁

靳辰光

牛 駿

胡商鼎

朱維垣

楊 煌

牛 璋

盧應先

明經

壽官

王復湯

劉 馨

鄭 通

耿映璧

陳仲元

清侯世封官山東登州府甯海州

蒲明鼎以明經爲項城縣知縣後補直隸元氏縣知縣二任早有善政
魏勸學學廩膳生每歲考一會特等九屬文武生童公贈漢上文人匾額
額在漢中府南門外江西館遺跡尚存後於康熙二十八年拔貢選訓導
念餘芳官鄜縣訓導
念餘恩官鄜州學政
恩拔貢生魏旭候選縣丞

辛應萬雍正乙卯舉人官陝西榆林府葭學政

節烈 五代

貞女失其姓爲梁將所掠義不受辱將亦不敢犯及卒塋於縣北名貞女

墓後漢王仁裕撰文立碑

明劉氏梁雲高妻爲廣平司訓設於官氏年二十一子校生甫七月矢志堅守教
子入庠鄉閭咸服其節

劉曇妻某氏失其姓夫疾久調治備極篤摯及卒氏縊死

馬烈女民馬義之女也崇禎時賊張獻忠破城以女有殊色挾去女閉目不從
鞭之佯死終不應賊粉其身死

來氏貢士盧效先之妻也崇禎間賊過天星獲之氏觸樹自絕

仙釋

唐張果在鳳州夏居豆積山冬居鸞鷲山明皇以璽書迎之入禁內以爲光祿

大夫賜號通元先生

明和尚翁畧陽人修真於仙人閣道成飛昇閣以此名

流寓

唐杜襄陽人由鳳州入蜀

宋文彥博字寬夫汾州人徵時客鳳州西當館富民某氏教授生徒

宋邵雍范陽人徙居河南客鳳州三月有詩二首

漢張良避穀隱紫柏山

本朝節烈

節婦彭馮氏年七十二歲係本縣人馮景運室女生於康熙十八年九月

十六日於康熙三十三年氏二十六歲於歸本縣軍籍民彭博萬爲妻於康熙

四十年博萬病故時氏二十三歲賦性堅貞持身謹慎十六於歸二旬夫沒事翁

姑以承歡表閨壺而無愧歷數十載之冰霜獲闔庠之公舉已於乾隆二年詳請

旌表建坊在案

節婦張曲氏年八十歲係本縣民曲從德室女生於康熙十年正月十五日於康熙

二十四年氏一十五歲於歸方石里六甲民籍附生張鳳儀爲妻於康熙三十一年

鳳儀病故時氏年二十二歲性成柔順撻勵艱真二十三歲夫亡五十八年苦節事

雙白之親承歡養志鞠三週之子畫荻和丸值饑饉漸臻勤紡績以度日茹

荼飲藥潛德幽光於雍正三年詳請

旌表建坊在案

節婦曹辛氏年五十四歲係本縣民辛克志室女生於康熙三十七年十月初二日於康熙五十三年氏二十七歲於歸梁泉里九甲民籍曹自睿爲妻於康熙五十六年曹自睿病故時氏二十一歲賦性冰霜勁節自持二十一歲遭夫弟逼嫁乃甘毀面剪髮值姑老疾恒代著更滌溺穢茹荼飲藥自甘貧沒清白勵節誓死不二節搵堪表已於乾隆十五年詳請

旌表建坊在案

節婦王董氏年七十歲係本縣民董理室女生於康熙二十年五月二十四日於康熙三十六年氏二十七歲於歸登俊里六甲民籍王祿爲妻於康熙四十七年

王祿病故時氏二十八歲柔順性成端肅自好十七於歸相夫子而有道二十八孀勵節搵而堅白夫亡泣欲相從地下翁姑勸慰以延生允爲循分守節於乾隆十二年詳請

旌表建坊在案

竹菴曰黃山谷言士生於世可以百爲惟不可俗俗便不可醫也予以爲俗即與草木同朽古之君子致慎於隱微用力於實踐本道德節義以發爲文章措之事業惟曰盡其分所當爲非以求人知也然寔至名自歸之此豈享高爵擁厚糈徒取一時之榮貴已哉

孔子曰君子疾沒世而名不稱焉名之所在昔人誠慎之也鳳之人物止此夫一

行足錄即堪千古持身涉世即免為鄉黨自好之士亦足垂芳名而壽
竹冊嗚呼三代以後士惟恐不好名蓋味乎其言之矣世之公行非義而
毫無顧忌者其謂之何

紀事

漢高帝元年正月項籍立沛公為漢王王巴蜀漢中張良送至褒中說王燒
絕棧道所過地以示諸侯盜兵且示項羽無東意七月漢王以韓信為大將八
月引兵從故道出還定三秦雍王卬迎戰敗走廢邱塞王欣翟王翳皆降
建武四年十月公孫述遣兵屯陳倉隗囂遣助馮異擊破之遣使報狀帝報
以手書曰將軍南拒公孫之兵北禦羌胡之亂是以馮異西征得以數千百人
躑躅三輔微將軍之助則咸陽已為他人據矣如今子陽到漢中三輔願因
將軍兵旗馬鼓相當倘肯如言即智士計功割地之秋也其後述遣使招囂囂
斬其使出兵擊之故蜀不復北出

十二年五月公孫述以王元為將軍使與領軍環安拒河池來歙等進攻元
安破之蜀人大懼使刺客刺歙未即死歙馳名蓋延延悲哀不已歙叱曰虎
牙何敢然今使者中刺客無以報國故呼巨鄉欲相屬以軍事而反效兒女子
涕泣乎刃雖在身不能勒兵斬公耶延收淚受誠歙自書表曰臣夜入定後為
何人所賊傷中臣要害臣不敢自惜誠恨奉職不稱以為朝廷羞夫理國以得
為本大中大夫段襄骨鯁可任願陛下裁察投筆抽刀而絕帝省書攬涕詔
以馬成代之晉隆安元年四月太白晝見東井

宋文帝時氏人楊難當作亂焚掠漢中蕭思話率眾大破之難當引還眾仇
池元嘉十八年復傾國入寇刺史劉道真與裴方明共擊敗之難當悉遁仇池遂平

後魏時氏人楊靈珍率眾萬餘襲武興梁州刺史李崇破之宋建安三年五
月以張浚為川陝京湖宣撫處置使便宜點陟浚謂中興當自關陝始故有是命
十月張浚治兵於興元辟劉子羽參議軍事子羽薦涇原都監吳玠及弟
璘材勇浚皆用之

四年九月張浚使都統制劉錫率五路之兵與金婁室大戰於富平敗績浚
退兵秦州浚聞兀朮將至檄召熙河劉錫秦鳳孫偓涇原劉竒環慶趙哲
四經畧及吳玠兵合四十萬人以錫為統帥迎敵決戰前軍統制王彥諫不從
遂次於富平已而金兵驟至諸軍驚為潰閔陝大震

十一月張浚軍興州遣吳玠守和尚原以拒金時有建言徙治夔州者子羽叱之

曰敵欲寇四川久矣直以鐵山棧道之險未敢遽窺耳今不堅守縱使深矣
吾僻處夔峽遂與關中聲不相聞進退失計悔將何及今幸敵方肆掠未逼
近郡宣司但當留駐興州外繫關中之望內安全蜀之心急遣官屬出關呼名
諸將收集散亡據險固壘觀釁而動庶可補前愆耳浚然其言故遣玠等扼險
以拒之金兵引去後子羽獨留河池時金州河池二鎮皆饑吳玠王彥請得子羽
留漢中張浚承制拜子羽知興元子羽至通商輸粟二鎮遂安

紹興元年十一月金兀朮寇和尚原吳玠及弟璘大敗之兀朮遁玠自富平之敗收
散卒保和尚原積粟繕兵列柵爲死守計金將沒立烏魯折合約日會和尚
原烏魯折合先期至陣北山索戰玠命諸將堅陣待之更戰迭休金人大敗遁
去沒立方攻箭著嶺玠復遣將擊破之兩軍終不得合金人自起海角祖於
常勝及興玠戰輒敗憤甚謀必取玠於是兀朮會諸帥之兵進薄和尚原玠與
弟璘選勁弩命諸將分番迭射敵稍却則以奇兵旁擊絕其糧道度其困
且走設狀於神龕以待之敵至伏發大亂玠縱兵夜擊大敗之兀朮中二流矢亟
斃其鬚髯而遁金自南侵未嘗有此敗衄深以爲愧初金人之至也玠與璘以敗
軍數千駐原上朝問隔絕人無固志有謀劫玠兄弟北降者玠知之召諸將歃
血盟勉以忠義皆感泣願盡死力故能成功

二年以劉子羽知興元府三年春正月金人陷金州王彥走石泉金人久窺蜀以
吳璘駐兵和尚原扼其衝不得逞將出奇取之乃以判將李彥琪駐秦州

仙人關以綴吳玠河池之師復令遊騎出熙河以綴關師古之兵撒離喝自商於直搗上津攻金州王彥以三千人迎敵而敗退保石泉撒離喝遂乘勝而進二月劉子羽吳玠兵潰於饒風關金人入興元子羽玠還擊破之時子羽聞王彥敗亟命田晟守饒風關而遣人召吳玠玠自河西日夜馳三百里引兵援之至饒風以黃柑遣敵曰大軍遠來聊用止渴撒離喝大驚以杖擊地曰爾來何速耶遂悉力仰攻關玠軍弓弩亂發大石推壓如是者六晝夜死者山積敵乃更募死士繇間道統出山後乘高以闕饒風諸軍不支遂潰玠退保興元之西縣子羽亦焚興元退保大安軍之三泉縣撒離喝遂入興元四川大震子羽從兵不滿三百與士取草芽木甲食之遣玠書訣別玠得書未有行意

其愛將楊政大呼曰節使不可負劉待制不然政輩亦舍節使去矣玠乃問道會子羽子羽留玠共守三泉玠曰關外蜀之門戶不可輕棄往復守仙人關子羽以潭毒山形斗拔其上寬平有水乃築壁壘方城而金兵已至距營十數里子羽據胡床坐於壘口諸將泣告曰此非待制坐處子羽曰子羽今日死於此敵尋以亦引去撒離喝既回鳳翔遣十人持書招子羽子羽盡斬之而留其一縱之還曰烏我語賊欲來即來吾有死耳何可招也初子羽聞有金師預徙梁津之積及金人深入餽餉不斷殺馬及兩河所簽軍士以食而子羽玠復腹背腰擊手之死傷十五六疫癘且作乃引衆自褒斜谷還興元子羽玠因出師掩其後金人墜溪澗死者不可勝計盡棄緇重而走餘兵悉降子羽遂還興元金人

始謀本謂玠在西邊故涉險東來不虞玠馳至雖入三州而失不償得
四年三月吳玠吳璘與金兀朮戰於仙人關大敗之金兀朮撒離喝劉夔師步騎
十萬破和尚原進攻仙人關玠以萬人守殺金平以當其衝璘自武階路入援冒
圍轉戰七晝夜始得與玠會於仙人關敵攻玠營玠擊走之遂復鳳秦隴州
九年以吳玠爲四川宣撫使六月玠卒

十年九月吳璘等收復陝西諸州詔班師還鎮

三十一年五月以吳璘爲四川宣撫使

九月金人犯黃牛堡吳璘等敗之遂復秦隴洮三州金徒單合喜攻黃牛
堡守將李彥堅告急制置使王剛中跨一馬馳二百里至吳璘營起璘於帳

中責之曰大將與國義同休戚臨敵安得高枕而卧璘大驚調兵分道進大
破之乘勝復秦隴洮三州三十二年二月以虞允文爲川陝宣慰使允文至蜀遂
與吳璘經畧中原閏月吳璘復大散關分兵守和尚原金人走寶雞九月詔允
文還議棄三路十二月詔吳璘班師璘奉詔退師還河池於是秦鳳熙池永
興三路新復十二州三軍皆復爲金取乾道三年五月太傅四川宣撫使新安王
吳璘卒

六月以吳玠爲興州都統制利州安撫使

八年洋鳳乏食

淳熙十六年冬鳳游饑

嘉泰元年以吳曦爲興州都統制兼知興州曦爲殿前副都指揮使賄賂韓侂胄許之由是兵權歸曦異志遂成矣

開禧二年吳曦謀反獻階成和鳳四川於金以求封蜀王金立吳曦爲蜀國王即遣郭澄奉表獻蜀地圖及吳氏譜牒於金

三年正月吳曦自稱蜀王四川轉運使安丙誅吳曦曦玠之從孫也襲父挺爲利州宣撫使已稱蜀王以安丙爲丞相丙稱疾不出先是監四川總領所楊巨源劉崇之與興州中軍李好義李貴等皆密謀誅曦以書報丙丙大喜始出視事二月好義率兵入爲宮詐稱議事執曦斬之博首臨安詔誅曦妻子家屬徙嶺南

三月安丙使興州將李好義等復西和階成鳳州及大散關六月安丙殺宣撫使楊巨源初吳曦誅獎諭詔至興州巨源以詔命一字不及疑有以蔽其功者俄報王喜授節度使巨源乃愬功於朝或謂安丙曰巨源謀亂丙命喜鞠其黨比白抵罪時巨源方與金人戰於鳳州之長橋而敗丙密使興元都統制彭輅收巨源械送閬州獄至大安龍尾灘丙使將校樊世顯殺之忠勇士聞者莫不流涕嘉定二年八月以安丙爲四川制置大使兼知興元府十二年金人復寇西和成鳳州入黃牛堡吳政拒戰死之

詔定四年八月元太子拖雷八騎兵三萬破鳳州趨華陽屠洋州而去

元至正十一年興元鳳州進麥一莖七穗穀一莖三穗

明崇禎七年正月流賊破鳳縣四月復陷別部賊二萬由鳳縣趨寶雞汧陽
巡撫洪承疇姑慰諭之賊盡歸漢中興安接於商洛後復出再陷鳳縣九
月賊分三部一由鳳縣攻漢中一出畧陽犯蜀一由甯羗犯廣元
本朝初滇逆吳三桂偽將軍黑邦俊分守益門鎮駐鳳縣賊衆往來漢鳳
間沿棧居民或棲山崖或藏澗谷几衣食資蓄剝掠殆盡後潰去道始平
順治十一年地震城圯

康熙元年七月內准開墾山坡以補水崩大糧

康熙十三年二月吳逆變亂鳳縣叅將先殺魯千總附亂偽將軍分駐河池
康熙十三年因大兵餉鞘過境需用猪羊米麵等費着里首賠墊申首避

差逃縣始有承糧認差之地畝

協和曰予讀史至宋棄三路未嘗不爲之廢書而三嘆也此與岳少保朱仙鎮
之班師同君子甯功之不立而惡不敢取其心良可悲已然吳氏兄弟猶得以
功名終而少保父子不免蓋亦有幸有不幸焉如曩之得罪君父而自陷形戮
則又何也

佛雖現於周昭特祥光耳夢於漢明持想像耳迎於唐肅特骸骨耳僧會
司始於洪武二十年僧籍於嘉靖三十年

官師

漢張良韓人高帝即位後謝病辟穀杜門不出曰家世相韓韓滅不愛萬金

之資為韓報讐言天下震動今以三寸舌為帝者師封萬戶侯此布衣之極於
良足矣顧棄人間事從赤孫子遊且後隱紫栢山惠帝六年卒文會紫
栢山下有留侯祠廟臺漢張良辟穀處路碑尚存

宋創建武十一年公孫述使盜殺監護使者來歙帝親送歙喪

宋蕭思話蘭陵人為秦梁二州刺史楊難當焚掠為害思話與劉道真裴
方明討破之遂收漢中故也

後魏李崇為梁州刺史楊靈珍亂崇多設疑兵出其不意靈珍驚遁孝
文大悅曰使朕無西顧之憂者李崇也

隋蕭瑀字時文後梁明帝子也因言事忤旨出為河池郡守部有鈔賊萬人

吏不制瑀募勇士擊降子悉捐貲蓄賜有功又擊走張舉眾數萬

唐高祖入京師瑀挈郡自歸授光祿大夫封宋國公

唐呂日將乾元二年為鳳州刺史嘗敗黨項羗於三嗟谷

五代

王環真定人為鳳州節度使周世宗遣將攻之為環所敗世宗攻之愈力秦成階
州皆降環獨堅守百餘日世宗以書詔之不答至力屈就擒世宗謂忠其所事
嘉嘆之

宋張暉為鳳州團練使疏陳險易太祖大喜及大軍下暉督軍開大散關路躬撫
士卒且役且戰民忘其勞

程德元榮澤人爲鳳州領鳳城軍馬事善醫術淳化中李順寇蜀乃簡任有戰功後入朝真宗命坐撫勞訪以邊事

种世衡字仲平洛陽人通判鳳州爲政公嚴州將王蒙正章憲后姻家也所爲不法嘗干世衡以私不聽蒙正使人訟而陰助之生流賓州徙汝州

程珣河南人明道父知鳳州仁宗時任政尚慈恕常宴客開元僧舍謹言佛光現珣安坐不動頃之遂定熙甯法行珣獨抗議指其未便累遷大中大夫

唐庚字子西丹陵人鳳州文學掾博士張商薦其才除提舉京畿常平唐爲文精密通於世務有文集二十卷

名宦舊祀內列趙鼎楊政按史僅稱紹興四年以鼎都督川陝軍事而楊政無

稽劉虞安丙諸人可紀者已詳紀事故不復贅云

舊鳳縣設知縣一員主簿一員教諭一員訓導一員典史一員梁山驛驛丞一員至清初裁革主簿教諭後又將梁山驛驛丞歸本縣官理金元職官無考明之知縣可紀者凡十有五人餘則止存其名而已

弋恂江陰人監生永樂中除公勤奉職吏民信服

馮惠河南安陽人監生洪武初除縣典史廉靜博學陞本縣令又陞兵科給事中楊忠山西聞喜人監生正統中除政治有聲士民感戴

馮傑山東利津人監生天順中除持身廉謹興學撫民官至知府

畢達山東齊和人舉人天順中除守已愛民

秦臻直隸定興舉人

屈浩通人俱成化中除

郝潤河南人

劉商大竹人

寧浩遼東海州人監生剛果有為捐俸修櫺星門鑿泮池造祭器以子貢
貴贈都御史

路謨河南河內人監生政尚寬平黎民懷之

蘓珏河南懷慶人舉人念邑殘瘠甘心澹泊廉介不取母喪東歸行李蕭
然見者無不流涕

薛應奎山西臨晉人監生剛毅精敏庶政修舉以上宏治間任
譙秉彝四川南充人舉人催科不擾人民悅服

那尚綱四川劍州人監生慈以恤民儉以守已

蘭佩河南陽武人舉人

王廷璋湖廣宜城人監生 郭嘉禎四川岳池人監生

陳鵬山西臨汾人監生 周監湖廣人監生

袁池霖魯山人恩生 甄偉大興人

司恩直隸內黃人舉人興革合宜才敏過人除強扶弱百姓咸服尋擢去任
邑人攀轅涕泣

譚儉四川彰明人監生以上嘉靖任

陳翰四川富順人舉人 徐克思麻城人

向閣四川通江人舉人以上隆慶間任

冀野直隸唐山舉人 郝宇四川高縣人舉人

焦宇 舊志作焦野 山西長治人舉人

匡振之四川合江人 高凌雲 舊志作凌奎 四川松潘人貢生

郭燧山西曲沃人舉人 任萬代直隸宛平人進士

劉懋四川閬中州人舉人 郝彬山西平定州人舉人

江大鯤楚雄人 劉明節鄰水人

葉選遼東定遠人歲貢 彭傳直隸蠡縣人舉人

王國祖直隸宛平人舉人 王之藩河南武定人舉人

崔相遼東三萬衛人歲貢

王睽疇北直隸清苑人舉人 湯鳳喈四川合州人舉人

侯加乘山西解州人舉人 劉之藩四川富順人舉人

朱廷臣江西豐城人舉人以上萬歷間任

楊茂齡北直隸清苑人拔貢天啟任

胡上進北直隸藁城人歲貢廉介有守丁憂歸仍補鳳縣未幾賊突至

破城捐軀殉節全家遇害士民憫之撫按題請褒恤

虞咨岳遼東三萬衛人歲貢

王雲鵬北直隸滄州人舉人 北冀明誠河南輝縣人監生

劉紉四川巴縣人歲貢以休甯教諭陞任後調繁洋崇禎間任教諭之
可考者嘉靖間余塘其著者

孔崇儒先聖五十八代孫寓籍四川隣水縣進士學道尊嚴持身正大卒於
官士林悲之

馮祀四川叙州府宜賓縣人嘉靖任

杜錦成四川叙州府宜賓縣人

張績四川成都人萬歷任

彭振翮湖廣襄陽人拔貢 原從泗山西人歲貢致仕

傅雲鵬直隸慶都人進士以憂去

周台江南人以憂去 趙雲程北直隸大興人拔貢

張石麟山東堂邑人拔貢以病去

張素仁滿洲人

魏廷賢字贊皇遼東松山人由世廕初任山西太原府陽曲縣令
馬見龍北直隸人進士被吳逆逼入四川不知下落

胡象乾奉天人 劉向遠北直隸真定人舉人

田得名北直隸保定府定興縣人進士

鄭禹秀江南人陞廣東南海五斗司

盧廷侯北直隸人

張士琬山東陽穀縣人貢士

鄭國表紹興人

林聯登福建福清縣人舉人

高斗先浙江湖州府長興縣人進士清廉公明勤儉敏惠剔弊除害

伊興祖北直隸人

胡靜浙江人

李芳梅江西南昌府新建縣人舉人

費謙流浙江湖州府烏程縣人歲貢

王福陞順天府宛平縣人吏員

趙省直隸樂州人吏員 千兆河南懷慶府武陟縣人進士

馮運棟浙江甯波府順天甲辰科舉人

耿勤業江南揚州府人歲貢 柳廷璣江南徐州府銅山縣人拔貢揀選

主簿今無

明畢 勛

張宗汾山西潼關人

王損順天府固安人

訓導

楚材

杜房澄城人

陶樸慶陽府人陞知縣

趙行可武功人陞禹州判官

任先覺潼關人

韓運昌扶風人

常致中鄆縣人

李道宗興安人

黃御袞武功人

劉澤遠臨潼人

劉本濶環縣人貢生

田國本涇州人貢生

李宏儒甘肅莊浪人貢生

典史

趙廷祿江南人 陳景熙江人

盧士燮江西人 錢恩榮山西人

余彪北直隸人 干灝江人

盧北直隸人 喻柯

巡檢

朱自顯浙江會稽人

徐以功

費貞河南鞏縣人

劉彬山西太原府陽曲縣人

郭鼎山西襄垣人

葉慎順天府通州人

驛丞

王廷美山陰人 陳朝賓青縣人 王者都直隸大興人

清

韓世用都司官驛順治初年任後歸本縣

蒲應璉浙江嚴州府人

張花奇山東東昌府臨清州人

馬孝標浙江紹興府會稽縣人

金士宏浙江紹興府山陽縣人

單良順天府大興縣人

由內閣供事自順治二年分以北鳳路踞雲

棧之衝鳳畧甯洋為四路設叅將一員中軍守備一員千總三員把總三員

至康熙二十一年裁汰千總一員把總一員康熙三十一年裁撥甯羌州千總一員

把總一員

漢鳳營叅將順治間任

李應文大興人

齊陞慶陽人

趙彞 隰榆林人

劉士美 蒲州人

黃加品 榆林人

李承恩 大興人

康熙間任

譚必海 蘓旺俱福建人

劉有謙 順天人

孫清

中軍守備

劉善直 隸人

馬自新

王欽

溫定國

蘓旺 福建人

杜文輝 榆林人

竹菴曰宋以上職官錯見前史自有明來府志載者始詳然優者止三語撮其實行餘或蒞政無幾未見施為則為書名誌里而已其劣與否

不可得而知也昔人善善從長之意其在斯乎抑予更有感焉君子之仕也片長足錄後之人即不忍沒苟無所建立士民不被其澤鄉里莫言其效雖榮當時沒亦遂已且令人或疑為酷吏而不之道也悲夫

藝文

春日入棧 十首

煎茶初聳目縹緲棧雲通密樹爭峰竦奔流觸石雄人行鳥道外天在水聲中可惜春還淺繁絮未放叢

春日入棧

回互峯巒縱橫澗壑紛蟻緣千仞壁馬踏半空雲鳥影垂鞭看林風隔水

聞險夷無定勢憂喜亦平分

突兀凌霄上驚心首重回輕身依鳥過揮手撥雲開風向空中御人從天
際來連山飛一瞬騰躍倚龍媒

兩日微平道萬山圍一身杉楓深結霧熊虎亂窺人峯暗天愁暮橋多水
厭頻稍欣山驛近頓覺減勞辛

留侯歸隱處紫栢秀參差山自何年買官能決志辭皇華垂老厭丹藥
大還期日者數前定春風勞夢思

蜀秦分幾代雲棧久經年危險還終古蒼茫只一天陳倉空蔓草紫栢
亦荒煙覩破人間世浮名盡可憐

絕巘沉淵上盤紆勢已傾山與勞卒挽崖樹護人行幾樹碧桃綻數聲
黃鳥鳴驚魂方未定耳目忽添清

秀絕觀音埵圍天紫翠寬江侵崩堰湧馬偏突巖盤高峽奔雷轉浮
嵐閉目寒不因於役迫坐卧飽奇觀

磴傍青雲起崖從碧漢懸峰回無淺地路折漸低天失足驚猿落高飛羨
鳥還懸崖能撒手猛欲學逃禪

褒城城下路砥矢慰勞筋南北峯還接巴秦界已分近收來漢節遠謝
介川雲酌酒醅前棧高吟醉夕曛

曾聞褒谷與斜谷八百里間山重複上有層岩下深江過此行人足皆縮歲
在丁卯夏戎作漢南遊踰晉歷秦四千里竭來棧道增離憂初度渭河向
秦嶺嶺頭叢木籠朝影循山之麓轉西南猶有康莊且馳騁馬逐征塵日
將午荆棘蒙茸莽回互抓衣刮面不見天莫敢揮鞭只首俯漸聞林外澗潺
湲前路蒼蒼直逼山路開岩半鑿鬼斧山削人面橫天關峻嶒怪石相叅起
五丁束手無他技從空架木渡行人狹道盤回常數里踏鐙挽韁筋力損鞭
策類加馬不前誰知鳳嶺亘天表別作崦嵫玩復何似亂石層層莫可履馬蹄
不向路中行總在峯尖石罅裏湏臾豁達見雲煙雲煙直繞胸襟前萬壑千
巖分咫尺長松與窟住神仙俯看天際下飛鳶已在層雲萬仞邊從此盤

旋且南向澗水齊歸江水漲兩日山程稍覺平觀音塢上渾難上塢石偏削江水
臨突入衝濤無限深上廣容一騎下瞰直千尋更值陰亡雷雨至山靈河伯總蕭
森棧道之險稱第一心驚步險行不疾不敢停驂試一看忽亡茫亡如有失迄灑
山行到七盤七盤嶺上草木寒昔人曾題子規句只今水剩復山殘計程跋
涉七朝夕鷄鳴關口橫空隔不知絕壁無極高但覺江波漸紆窄自此撐眉方下
關直到褒城出萬山且闢塵封署聊以釋征鞍回頭延望白雲端莫訝人歌行路難

空山行

許孫釜

驅車九折坂四顧殊險艱熊羆隨我後虎豹當我前百里幾居民茫茫已鮮炊
煙有時見茅屋或剩三四椽山妻面復黑稚子衣不完觀其所耕地半在山水

間磽确驅策勤牛力業已殫自從遭喪乱鷄犬亦罹患此方爲孔道誰肯恤
凋殘歎息問羣黎汝何守空山

棧道銘

秦之坤蜀之艮連高夾深九州之險也陰谿窮谷萬仞直下奔崖峭壁千里無
士亘隔呀絕巉巖冥亡瘴鹿無谿猿獠相望三代而往蹄足莫之能越秦雖
有心蜀雖有情五萬年間曼不相接且秦之興蜀也人一其性物同其宜嗜欲
無餘門教化無源可貿遷可親昵擘手折地脉睽離物理豈造化之意乎天
實凝清而成地實凝濁而形當其凝也如鎔金下鑄騰雲上浮空隙有所弗
開迴翔有所不合澄凝既定竅缺生于其中西南有漏天天之竅缺也於斯

有茲地地之竅缺也天地也者所以上覆下燾含蓄萬靈可通必使而通者也
苟有可通而未通則賢代其工而通之故有爲舟以濟川爲梯以踰山惟茲
地有川不可以舟涉有山不可以梯及粵有智慮以全元造立巨衡而舉追代繼
懸纏以下梓人猿垂絕谷馬傍危岑鑿積石以全力梁半於未用斜根玉壘
旁綴青泥截斷岸以虹橋繞翠屏而龍蹠堅勁膠固雲棧砥平總庸蜀之
通途統岐雍之康莊都邑之能步山川之蕪徑若水決防如鴻向陽南之北之
踵武湯亡躋嵗亡以自苦臨蒼亡而不懼由是輟貫幣以遙遠人神以會同稽禮
樂之短長污隆可王者王可公者公而相吹以風或曰受琢之石長存可構之材無
窮易刑代蠹斯道也未始有終嗚呼爲上懷來在手德爲下昭德在手

義德義之如今日則或人之言有孚其鏡之則石雖存或不爲琢材雖多
恐不爲構相夫往昔有時而有已時而無是用惕也天下蚩也知聖賢創物之
多寡明德義固物道之人稀敢陳兩端之要銘諸斯道之左庶主德義者存
今身之所履踵武湯者荷古人之攸作銘曰天覆地壽本以同設大象雖全或
漏或缺損多益少聖賢代工彼雖有缺與無缺同維北曰秦維南則蜀地缺其
間坤維不續斗起斷岸屹爲兩區秦人路絕蜀火煙孤天實不通賢有造
鑿堅刻勁無蹊以通若川非舟若陸非車緣危轉虛步驟交如構雖存功存
亦由德項拂劉怒旋見以踏隋落我榮自顛而植地非革勢材不易林培
植以致惠怨之心勿謂斯道可久禮不以禮可有而無恭不以恭可無而有

創之之意如彼固之之理若茲彼之不易茲而易知勤民道左其同我心

宋雷簡夫白水路記

至和二年冬利州路轉運使主客郎中李虞卿以蜀道清泥嶺舊路高峻
請開白水路自鳳州河池驛五十一里有半以便公私之行具上未報即預畫材
費以待其可明年春選興州巡轄馬鋪殿直橋達領橋閣并郵兵五十餘人因
山伐木積於路處遂藉其人用訖是役又請知興安軍事虞部員外郎
劉拱摠護督作一切仰給悉令爲具命僉署興安判官太子中舍李良祐
權知長舉縣事順政縣令適應程度遠近按視險易同督斯衆知鳳州
河池縣事中丞王令圖首建路議即移文令圖通幹其事至秋七月始可

其奏秋八月行者已走新路矣十二月諸工告畢作閣道三千三百九間郵亭營屋網院三百八十三間減舊三十三里廢青泥一驛除郵驛馬一百五十六人驛歲省驛廩鋪糧五十石畜草一萬圍放執事役夫三十餘人路未成會李東川路令轉運使工部郎中田諒自審其績狀可成故喜猶已出事益不懈於是斯役肇於李而遂成於田也

嘉祐二年三月田以狀上且曰虞鄉以至和二年仲春興是役仲春移去其經營建樹之狀本於與令圖同臣雖承乏在臣何力願朝廷旌虞鄉令圖之勞用勸來者又拱之總役應用良祐應之按視修創達之採造堅鎖皆有著效亦祈陞擢至於軍士十長而下並望賜予以慰遠心朝廷依議其請初景德

元年嘗過北路蓋青泥土豪啣匕巧言語以疑行路且驛廢則客邸酒廬為棄物矣浮食遊手安所仰耶小人居常爭半分之利或睚眦相抵行人劫之急射一日十倍之貴顧肯嘿匕耶造作百端理固然耳向使遇者不怖其誕說賢者不感於風聞則斯路初亦不廢也大抵蜀道之難自昔以青泥嶺稱首一旦避險即安寬民省費斯利害斷然易曉烏用聽其悠匕之說耶而後之人見成之易不念始成之難苟念其難則斯路永期不廢矣嘉祐二年二月六日記

過鳳縣

明薛瑄

莫道西行蜀道難老來深喜縱遐觀山從太白連岷嶺水號嘉陵出

散闕石積層岨知地厚路登絕嶽覺天寬驅兵過此思諸葛大節常留
宇宙間

八棧

顧畏

蕩漾碧天痕金鎮益門臨岐悲阮籍步坂憶王尊狐兔羣穿穴漁樵何
處材盤旋依古道桑柘未堪論

殺虎行

本朝葛思泰

險徑多猛虎爲患在茲土磨牙吮人血惠子毛髮怒獨奮持白挺擊殺賴
神武猛惡宜盡誅歷歷斃堪十數甯誇力拔山毋爲斯民苦

出連雲棧

楊慎

入關秦地盡出棧蜀山長樹迴雲隨馬溪迴石作梁鶯花春未老湖海路
初償不盡平生意先看是廟廊

連雲棧

孫昭

危樓斷閣宜梯平磴道迎雲寒易生落木倒聽雙壁靜飛輪斜渡一空橫
高秋數息征鴻翼岨壁時翻瀑布聲未信關南地形險翻疑仙洞石梁行

柴關嶺

趙貞吉

還山西走長安道入棧青春聽啼鳥弱冠登朝忽已老杜宇聲已歸去
好人間何事不堪了直待臘除悔不早君不見七十二洞紫栢深若海人
爭欲沉

武閔驛

江特用

匹馬驅馳上七盤，捫參歷井豁酡顏。
藤蘿倒掛三千尺，瀑布飛流數百灣。
殘雪難消天漢路，浮雲不散古梁山。
如今更覺巖廊險，幾度逢人嘆武閔。

武閔驛

呂頌

千峰日照武閔西，宛似虹橋瞰碧溪。
野鳥閔花各自在，惱人惟有杜鵑啼。

鳳嶺

鄭日奎

出郭即乘險，旁人幸此躋峰回。
千徑失雲壓萬山，低怪鳥衝人過寒。
猿着意啼到來，慙老納閒坐閱輪蹄。

鳳嶺

鄭日奎

此嶺空名鳳，何時鳳再還。
猶將千仞意，橫絕阻躋攀。
往事夢非夢，前行山復山。
不知嶺頭水，幾折到人間。

連雲棧

披圖每嘆連雲險，登覽方知蜀道難。
馬向雲端踏鳳嶺，人從天上渡鷄關。
鳳州十二大峯崇，峙立嵯峨宇宙中。
不與巫山論高下，敢同四嶽列群雄。

仇池山

萬古仇池穴，潛通小有天神魚。
人不見福地，語真傳近接西南境。
長懷十九泉，何時一茅屋。
送老白雲邊。

西歸出斜谷

行過險棧出褒如畫平川似到家無限客愁今日徹馬頭初見米囊花

棧道口占

馬愛山行好介然古棧通履屨登巖頂梯磴入雲中瀑布當前落楓林對面紅崎嶇經過處坦路自無窮

御愛山

王素

當日蒙塵歷險艱得逢蒼翠喜開顏吾皇高拱巖廊上只愛生靈

不愛山

仇池石

蘇軾

海石來珠宮秀色如蛾綠坡陀只寸間宛轉陸壘足連娟一華頂空洞三茅

服初疑仇池化又恐瀛州履慙慙嶠南使餽餉揚州收得之喜無寐興汝交不賈盛以高麗盆藉以文登玉幽光先五夜冷氣壓三伏老人生如寄茆舍久未卜一夫幸可致千里常相逐風流貴公子竄謫武當谷見山應已厭何事奪所欲已留嗟趙弱甯許負秦曲傳觀甚勿許間道歸更速到蜀後記途中經歷

雍陶

劍峯重疊雲已漫憶昨來時處已難大散嶺頭春足雨褒斜谷裏夏猶寒蜀門去國三千里巴路登山八十盤自到成都燒酒熟不思身更入長安

初入棧道

許讚

梁漢起天中形連百二雄萬山爭地立一路與雲通樹杪過人影崖頭嘯虎
風我行三月暮悵望華陰東

路轉峰巒路轉賒滿空處上帶煙霞只因駐馬山頭望眼底群山點點沙

登鳳嶺

邑辛思齊

鳳嶺雲中起登天指顧間置身千仞上一覽小群山

此系栢山

魏壽期南鄭令繁昌人

澗壑神仙宅到來生道心翠微千仞峻白日萬山陰設上清翻樹悠上雲
出林至今思避穀天外遠鴻音

曉過鳳嶺二首

杜子美

霜寒曙景動戴月陟層顛馬足低臨樹峰腰側見天雲光開竹石秋色老
林泉回首山城裏稀疎出曉烟

壁立當天半雄奇非一名踈煙時起滅疊嶂幻陰晴綠遙巖花紫凌風
梵磬清徘徊下山路石磴拂雲平

丙寅夏日連雲棧

八首

金世法

星辰近可接雲棧渺難分飛鳥沉青靄行人帶白雲連山猿觀客繞榻
虎呼羣偏是多幽趣泉聲枕上聞

徑轉千峰窄泉飛百道寒野花香細已老樹碧漫已茅屋雲邊店
危橋柳外灘那因貪勝賞行路不知難

雨過苔逾滑風多暑氣清天邊驅馬出樹杪見人行倚澗峰疑落懸崖
路欲傾棧中隨處險何必問山名

崎嶇難自主行其甚由身怪石頻驚鳥饑鳥不避人山光遙接蜀江勢欲
吞秦拙性耽奇僻何曾憚苦辛

山色重已古閉雲漠已長辟苔飛老蝶潭樹冷斜陽驛暗孤亭寂人
稀小縣荒行來纔幾日空翠滿輕裝

好客看不盡流水更潺湲百里轉萬壑千盤過一闌鶯啼蒼翠裏
人在畫圖間豈是嗟行役荒已感歲難

最怕過偏橋還愁上碧霄亂峰斜刺眼叢莽直齊腰野音常在

春風凍不消漢陽何處是隨路問山樵

馬道驛

張佳胤

馬道驛臣八五身寄西秦家東魯耳聾齒脫髻如霜出入逢迎狀
但俚路接青橋典武闕棧道崎嶇無與伍不卑小官有展禽不薄乘田
有尼父爾心豈是學聖賢蝸角蠅頭良自苦余也東朝師保臣岡生六十
負君親抗章數十不得請今始結驛歸梁岷官情見爾如膠漆方信余
爲勇退人

棧道感懷

胡汝霖

長劍嗟何倚焦桐帳獨携十年錦橋柱萬里浣花溪浪跡違鳩鵲霜天

入竇難益門紆碧澗秦嶺折丹梯反徑堅冰合危橋怪石躋雲林深
不測艱艱自應迷行李誰東道空囊挾病吳庸踈虛努力簿劣走
塗泥去路須存馬拌弓恐射糜流離分老稚凍餓輟耕犁死鴉結衣
短生餘垢面驚有心摧舊血無淚續新啼日氣千山暗風聲萬壑淒側
身思漢輔何計救周黎目極江河潤心懸雨露低職司俱愞已客好暇提
野戍增烽燧郵亭蟄馬蹄情人結新水徒步翻攀躋縮綬愁多緒
彈冠汗決題那堪筋力盡且畏簡書稽流水能相送停雲似欲溪
高歌生感激佇立重酸悽安得陽春布堪投投谷口棲比鄰安服食出入

橫東西

賈大司馬修棧歌

堂崇雅

憶昔淮巍棧道難千峰環峙白雲端參差岐嶺迷高日俯仰重關枕
急湍煉石誰能旋大造移山今喜闢奇觀羨君才力誠名世削盡懸
崖路幾盤

賈大司馬修棧歌

梁清寬

君不見棧道高去天尺五馬盡縮足人咸偃山前白骨野火燐江岸積
骸泣無主中丞巡邊心惻然濟川煉石何今古誰云天險不可移五丁曾罵
施巨斧積薪一炬石爲折錘鑿既加如削腐隘者潤屹者平冠蓋利涉雜
商賈昔日百里無人煙行役更多豹虎苦中丞極意盡經營伐木成

棟茅作宇鳳嶺鷄閔似垣途中夜酣憇焉安堵回車不用愁王陽開
闢功足補大禹吁嗟乎天下險阻甯止此人心魄懷難悉數對面戈矛不可避
翻手爲雲覆爲雨吁嗟乎安得中丞此大力盡平世間嶮巖之處長無忤

鳳縣春雨

侯蔭科

鳳地山還縣川原景物新栢青雲外寺花滿雨中春復穴風還古牛
羊趣更直東阡與南陌麥色正宜人

題張果隱處

劉星軫

我愛消災岬此中有佳處橋涉嘉陵江迄遲縱雲步中有一徑通盤
折無層數秀石懸空岬幽窈多清趣憑欄遠望間竟迷入山路惟見
清冥合山川起煙霧傳云張果仙棲此發神悟長嘯惟幽人白雲自來去

重修鳳州儒學泮池記

明教諭 余塘

鳳邑古之鳳州也元末兵燹廢弛明洪武四年復創建焉其泮久而成陸
嘉靖乙巳春仲月閩南分守金華潘公見而歎曰黌宮作泮制也陸而
弗濬可乎遂命署邑簿尉中川喻居爲之於是年冬即捐俸金鳩功
構材越年孟夏落成厥鑿惟深厥築惟堅厥甃惟精橋構以石檻環以
木扁登以坊前題曰躍天池後題曰龍門池水導自竹雲之渠其名有別
其行有常盛夏弗盈窮冬弗涸是誠有本會彰明譚君儉新且茲如
唐楚君材新訓茲學偕喻君與塘往觀之采芹樂泮俊髦圍橋乎

多士乃推其本以勵之曰泮之作也得名而不得其所以名聖王建學造士之意荒矣蓋古者天子之學謂之辟雍諸侯之學謂之泮宮泮者半也形如半壁言半於辟雍也泮之名始此而意則取諸水焉今天水滙百川鑿萬象之道之行且明也道之大原出於天成於性聖人特出而寄之聖王在上道在聖王經制大備故其道行孔子道在而位不在為以一身而兼述作之任以立天地之心以建生民之極教化無窮斯道大明於萬世典常道之原也德行道之委也經籍道之潤也藝文道之流也孔子其海矣顏會之流幾至於海而善學海者也冉閔程朱之流學海而朱至於海者也董楊蕪韓之流觀於海而難為水者也下此皆望泮矣明興以來迪哲化導沿流溯原孔子

之道其明且行猶諸水也故子思謂仲尼川流教化孟子亦以觀瀾為觀水之術欲志道者下學而上達盈科而進耳爾多士涵泳思孟子之本論充養原泉遏絕行潦則海廢乎其可學矣此固聖王建學造士之至意而聖賢之所望於後學者也雖天龍門云者期學者明以行之也此又喻君作人之至意也多士其亦知所奮庸乎哉

三岔鋪即馬道驛南一里橋閣二間邑人李瓚獨力鑿石為之亦為永記也自褒谷東北十里出連雲棧直抵鳳州斜谷七百里張良燒絕所過棧道魏武出斜谷渡要以臨漢中諸葛由斜谷取郿皆此道也

按褒城志漢中當雍州之西南褒在漢中之西北壤接西蜀當在東井十五

度十六度之間而鳳邑又在褒之西北其分野疑亦在東井云

棧道所出有四從成和階文鳥沓中陰平道鄧艾伐蜀由之從西當出者
焉改道漢高帝攻陳倉由之從褒鳳者出為今連雲棧漢高祖南鄭由
之從洋縣出者為斜谷遵武侯屯渭上由之此四道三谷者關南之險阨
攻取所從來固矣按西都賦注褒斜谷在長安西南曰褒北曰斜長四
百七十里其水南流張良燒絕棧道即此

古鳳州八景

鳳嶺晴嵐

嘉陵春漲

竹雲古洞

豆積仙踪

紫栢凝水

玉皇靈雨

鼈池碧水

棧道連雲

鳳嶺晴嵐

劉星軫

嵯峨高嶺入晴空疊翠層嵐一望中岫靄祥光來彩鳳泉飛瀑布掛長
虹極天鳥道千重折連棧雲程萬里通每憶鸞鳳苞采麗朝陽樹老
碧梧桐

嘉陵春漲

劉星軫

嘉陵江水漲春波倒映山光有幾多
岯石氣蒸通故道堞樓影樣接岩
阿花明錦浪觀魚躍柳暗清溪看鳥過
正是仙源相引處浮舟載酒意如何

竹雲古洞

劉星軫

洞號竹雲作拂雲洞中清靜絕塵氛竹因彩鳳飛瓊實雲為仙人曳錦
紋幾處煙霞空夜月許多嵐翠映朝暉著書願得名山住石室何年聚典墳

豆積仙踪

劉星軫

乘興來登豆積山通元曾此駐童顏遙瞻南岐雲千疊俯瞰嘉陵水一
灣城郭依然半天上鶴鷺應是嘆人間於今丹灶獨留跡古洞長松石有斑

紫栢凝水

劉星軫

馬訪仙踪到碧岑高峰紫栢正森人舒長嘯山皆靜雪積層水夏亦
陰好雨連雲春種藥清風對月夜聽琴迴看古洞雲封處此地重來未可尋

玉皇靈雨

劉星軫

帶雨靈雲起玉泉會流澤潤自長天山寒鳥過難留蹟石覆神光別有緣
麥秀阜原增瑞色人歌草野樂豐年烏霖凝試經綸業早遍齊州九點煙

電池碧水

劉星軫

澄潭碧水長靈電極嶺常清勢自尊宛是水池留日月更無濁浪震乾坤
瓊漿玉液堪朝飲桂葉松香映夕昏不染一塵稱靜澈植蓮相約酒盈罇

棧道連雲

劉星軫

捫星歷井忽康莊古棧連雲接雍梁七百里通秦塞曲千年闢蜀山長每
凌石磴登天路直俯巖潭履鳳岡客旅莫言行道險於今萬國正梯航

早行南岐山

邑增耿協和

山嶠紆迴上碧空
晴雲曉影散閑東
樹籠古峽春常住
棧亘層霄路自通
終日人行泉響裏
隔林樵語鳥聲中
我來幾度渾無倦
驢背吟學放翁

重過鷄頭閣感用僧舍壁間韵

邑增耿協和

留別褒斜歷五春
重過峻坂頓滄神
雲連蜀道猿啼雨
風老秦關馬踏塵
危埭怕聽江浪湧
幽林喜送寺鐘頻
慇懃迎客供茶灶
還有山僧識古人